

四庫全書

史部

欽定四庫全書

史部

欽定八旗通志卷

一百九十三至
一百九十四

欽定四庫全書

欽定八旗通志卷一百九十二

人物志七十三

大臣傳五十九

漢軍鑲黃旗五
楊廷璋

張允隨
范時綬

英廉
范

時紀

張允隨

張允隨漢軍鑲黃旗人祖一魁福建邵武府知府
有政績祀名宦祠允隨由監生捐光祿寺典簿康

熙五十三年授江南寧國府同知五十七年擢雲南楚雄府知府雍正元年六月調廣南府旋丁憂二年十一月

特用曲靖府知府十二月擢雲南糧儲道五年六月遷雲南按察使十一月擢布政使八年五月調貴州布政使八月授雲南巡撫十年十月疏言鎮沅府恩樂縣新政土為流請設鎮沅府教授一員恩樂縣教諭一員二學取進童生各八名下部議行十二

月疏言滇省各府州或兵少米多或兵多米少米少則挽運維艱米多則紅朽足慮請將廣南廣西鶴慶永昌曲靖永北尋甸羅平南寧太和南安鎮雄保山新平支山會澤等處額徵條銀每兩折收米一石阿迷寧州雲龍雲州鎮南通海蒙自姚州元謀等處額徵秋米每石折銀一兩其普洱攸樂威縣鎮沅等處以一兩折給兵丁不敷買食請酌增以癸丑年為始停止採買十二年九月疏請於

廣西府開鑪鼓鑄均議行十三年八月疏報蒙化
府墾田二十六頃有奇乾隆元年疏請昭通府屬
之永善縣增設縣丞一員駐劄副官村其副官村
巡檢移駐古寨歸魯甸通判轄二年署雲南總督
十月疏言滇省水利與別省不同非有長川巨浸
可分疏引注其水多由山出勢若建瓴水高田低
自上而下宜疏濬溝渠使盤旋曲折加以木覘石
槽引令飛渡間有田高水低處則宜車戽遇雨水

漲迅流直下不能停滯則宜濬塘築壩蓄洩得宜
使兩岸均沾灌溉至低窪之處下流多係小港水
發未能暢流恐致淹漫則當疏水口以資宣洩如
遇山多沙磧又當築堤以護田畝滇省水利情形大
概如此歷年已興之水利內有官民協修者有借
公項修分年還款者有動帑興工造冊報銷者現
在勘修水利若不酌定章程難保無推諉之弊請
分晰定例如田間溝洫及一二村寨閘壩與應修

之舊有溝堤工小費輕者令地方官查明於農隙
按田出夫督率興修如工程稍大出夫外尚有應
須工料者令地方官率士民公議需費多寡於有
田用水各戶照田分派先借與司庫公項興修工
竣後分年還欸倘有工大費繁非民力能勝者則
勘定情形估詳結報即於雍正九年官庄變價項
下動給工竣另委確勘取具冊結題銷則已興之
水利既得永遠保固未興乏水利亦可次第查修

報

閏三年三月疏請停鑄運京錢五年三月疏言滇鹽不
敷民食查安寧州有洪源鹽井試煎一年獲鹽二
十一萬六千觔運至省城行銷麗江府有老姆鹽
井試煎一年獲鹽一十八萬四千一百二十一觔
分撥鄧州劍川浪穹三州縣行銷俱定為年額得
旨此事若能妥辦實有益之事也六月署貴州總督六
年三月報獲鄰省妖言結夥之要犯黃順等

諭曰汝不以五日京兆而於此等事無不盡心辦理實屬可嘉是月疏劾台拱營叅將趙國儀縱兵搶火盜

帑誣良

上獎其不避嫌怨四月署雲南總督七年三月奏請木
欺古地方設汛兵一百駐劄文職一千總一外委
一並於川江兩岸設六塘每塘兵十名所設弁兵
於昭通鎮標四營抽撥一百東川本營抽撥六十
遴選千總外委各一文職將就近巡檢移駐下部

議行六月疏言准部咨各省標營增設兵量加裁
減查雲南惟昭通鎮普洱鎮有增設兵額均屬極
邊衝要未可議裁惟有通核合省之標鎮營協按
兵額多寡均勻攤減庶於通省營制無畸輕畸重
之患請將督提二標各裁兵一百撫標裁四十臨
元等九鎮各裁五十廣羅等十五協營各裁三十
順雲營裁二十共應裁一千一百六十名先裁餘
丁四百四十八名遇缺出漸次開除停補於營制

並無更張從之先是允隨請開通金沙江水道

上命都統新柱四川總督尹繼善會勘十一月疏言臣
與新柱尹繼善和衷查勘金沙江發源西域入滇
經麗江鶴慶永北姚安武定東川昭通七府至叙
州府匯入川江源遠流長實為西南大川自東川
府以下南岸係滇省北岸係川省夾岸營汛分布
田廬相望至大井壩以上南岸尚有田廬北岸俱
高山峻嶺山後即沙馬阿都兩土司地從前棄在

著境舟楫不至自烏蒙改流設鎮滇省每年赴川
採買兵糧均由叙州新開灘至永善縣黃草坪五
百八十里沂運其黃草坪至金沙廠六十里亦商
賈販運之川路內有大漢漕四崖三腔鑼鍋耳等
灘水勢險急冬春之際商船難行應興工修理俾
下游無險上游自金沙廠至濫田壩二百二十七
里共十二灘而濫田壩最險次則小溜筒臣親至
灘頭相度小溜筒係於山根石嘴鑿出石礮雖因

江水未退石礧尚未露而江流迅急斷無沙石淤塞之患濫田壩灘長四里現在水長丈餘南岸所開子河亦未露出詢之水手俟江水再退數尺即可通舟至開鑿子河之處離山甚遠下係稻田無俟防其冲塞自雙佛灘至蜈蚣嶺險灘鱗接石巨工艱縱加疏鑿下水仍屬堪虞臣業令改修陸路以避十五灘之險滇南僻處極邊設遇水旱米價騰貴今以次開通川道可以有備無患

諭曰既可開通妥協為之以成此善舉十二月疏言普
洱府係新闢苗疆所屬寧洱縣管轄苗寨遠者五
六百里每年納秋米供普洱鎮兵糧沿途高山密
箐牛馬不能馱運肩負往返十餘日其地有刀耕
火種產米無多者又有祇堪種菽不能植稻者完
納本色甚為艱苦請照攸樂縣例每石折徵銀一
兩地方官採買給兵部議從之八年五月疏言大
理府洱海發源鶴慶府之瀾沮河至大理合蒼山

之十八溪匯而成海下合趙州蒙化之水由波羅
甸出天生橋入合江鋪而總會於瀾滄江竇迤西
巨浸但海身長百二十里廣二十餘里而出水之
天生橋一帶海口濶不及一丈每當大雨水漲海
口子河輒致砂石衝塞河旁各溝冲沙成埂水溢
倒流致太和趙州鄧川及浪寧賓川之沿海田畝
不免淹浸而鄧川之東湖西湖低田時被水患臣
飭令太和等州縣調集民夫於正月興工築壩將

海口子河開寬二丈濬深五尺餘自波羅甸劉家園打魚村清風橋黑龍橋子河橋三道子河直達天生橋逐節開濬或施人力或用牛犂壘石砌堤外栽柳樹其最要之趙家園拱沙龍則用犂木為椿傍溝亦俱修石壩外栽茨柳沙去流暢不特近水州縣無漫溢之患且洄出海田約一萬餘畝即令附近民認墾照民堤民修之例責成墾戶五年大修一次按田出夫合力疏濬報

聞是月授雲南總督兼管巡撫事務九年四月疏報東
川府阿壩租地方開採銅礦試煎一月獲銅四萬
餘觔

上獎為甚善之舉十年三月加太子少保十二年三月
授雲貴總督七月奏言貴州在在苗疆簽設土弁
原為綏輯苗民豈容私收濫派甚至串通蠹役藉
端嚇詐查苗獮雖種類各殊皆具人心如果撫馭
得宜自不至激成事變臣嚴飭苗疆文武毋許滋

擾至苗人滋事率由漢奸勾結臣飭令地方稽查
倘有外來奸匪入寨煽惑者立即擒拏究治奏入
諭曰此所謂中肯綮之論也實力為之十月疏言黔省
思州等府與湖南接壤今辰沅一帶饑民百餘人
赴滇挖蕨度日彼地秋收既薄被災諒不止此百
餘人恐交冬以後乏食貧民來者益衆採蕨不足
資生臣仰體

皇上愛養黎元至意即飛飭貴州布政使糧驛道於脩

公銀內動銀三百兩差員星往思州會同地方官
按大小口每名酌給三個月口糧銀兩以資接濟
並飭查明續到人口即一體散給安置

上嘉之十五年正月授東閣大學士兼禮部尚書三月
加太子太保十六年三月卒遺疏上

諭曰張允隨簡任中外宣力有年忽聞溘逝朕心深為
軫惻應得卹典察例具奏旋

賜祭葬諡文和

范時繹

范時繹漢軍鑲黃旗人大學士文程孫兵部尚書
承勲子初授佐領遷叅領雍正元年正月授馬蘭
口副將二月擢總兵四年四月

詔署兩江總督八月遷正藍旗漢軍都統五年六月調鑲
白旗漢軍都統皆仍署提督疏言江南通州地勢
西高東下河水由江入海以通州為咽喉必水口
深通蓄洩得宜則泰州如臯均受其益通州運河

入海之口凡三處觀音壩逼近大江地屬浮沙鹽倉壩之水高於江水俱難建閘惟唐家壩舊存閘基距江二十里中間稍淤請行脩復旁有兩小閘一律開通改為石涵洞於農田水利有益十二月奏將江蘇安徽各州縣應徵丁銀勻入地畝內徵收以雍正六年為始均從之先是給事中許承宣條奏揚州水利

勅下時繹等定議六年二月覆奏五塘久淤成陸民墾為

田難以改挑惟塘內溝汊築土壩截水塘外帶子溝烏塔溝槐子河可以挑通接運河之水以灌兩岸民田至串場河為高郵寶應江都泰州興化鹽城如皋等州縣湖河入海尾閘年久未挑海口浮沙仰面河身淺窄急宜挑浚而下河七邑興化地最窪諸水匯歸分流東注又梓新車路白塗海溝界河等俱應疏深俾直連場河其場河自泰屬富安場至鹽屬伍佑場王家港牛灣等處並宜深挑

又秦州城北鮑家壩之運鹽河應築土堤劉莊之
青龍橋鹽城之石碓口天妃口廖家港草堰口如
臯之直洋黃沙洋宜增建石閘董家溝徐家涵等
處應設涵洞以資宣洩三月疏言江屬蘆洲坍漲
不常丈勘之年以漲補坍致彼此混淆請將兩江
蘆洲田地逃員清丈分割疆界錢糧案件酌歸附
近州縣管理均下部議行是月擢戶部尚書仍署
總督六月條奏兩淮鹽務七事一各竈燒鹽處令

商人舉幹練殷寔者按場酌用數人設竈長巡役
查核鹽觔多寡盡入商垣以杜竈丁私賣一各場
大使將入垣鹽觔按月冊報巡鹽御史衙門察核
一州縣場司設十家保甲遇私販據實首明治罪
私鹽變價分別賞給誣者反坐徇隱州縣場司官
照例議處一兩淮所轄兩省鹽務案件請飭湖廣
江西河南各駟鹽道督緝就近審結一兩淮地方
遼濶私梟易於盤據飭官弁兵役巡查緝拏一場

員襍職賢愚不等請令督撫將所屬場官甄別留任
餘請揀發家道殷寔之候選同知等員管理場務
一貧民許負鹽四十觔於不銷官引地方易米度
日如有假託運送窩囤嚴拏治罪又言漕標廟灣
鹽城二營沿海汎遠兵少稽察難周請於射陽湖
口窈子港增守備把總各一兵二百沙船八分撥
游巡部議從之七月

上以蘇松等處盜風不息巡撫陳時夏不以時嚴拏懲治

范時繹戢盜之才亦覺不足

詔將江蘇所屬七府五州盜案俱令浙江總督李衛管理

七年

詔發帑銀交各督撫提督營運濟兵江南督標兵千一百

七十應領銀六千時繹慮標員有侵擾弊奏請將

應領銀承買入官變價房產交坐落州縣官招租

解總督衙門發中軍以脩惠濟

上嘉其妥協時李衛訪得江寧有張雲如者以符咒惑人

謀不軌遣遊擊馬空北齎文提拏而時繹及按察使馬世圻回護失察咎又曾與雲如往來輾轉關查不解八年二月衛疏劾之

命尚書李永陞會鞠得寔解時繹任論世圻罪雲如等伏誅五月

命時繹協理河東河務七月河東總督田文鏡叅時繹於伏汎時安坐誤工請革職嚴審

諭曰范時繹乃一旗員朕念其為勲臣之後加恩擢用諄

諄訓誨望其克紹家聲乃在江南總督任內玩愒廢弛
因循苟且無一察吏安民詰奸禁暴之善政且其居心
行事詐偽不誠巧令朱鴻緒在朕前奏其操守廉潔至
於日食不敷朕聞之惻然動念急令江南江西巡撫等
為伊籌畫養廉之道及查明之後始知伊於應得之項
原係收受並不至於艱窘而朕猶欲俾其用度寬餘仍
令加增以與之無非成就其操守使之專心殫力於封
疆也乃浙江地方漸藏匪類生事不法蠱惑人心朕令

李衛悉心查拏又密諭范時繹務必慎密拏解勿使漏網豈料范時繹袒護私交縱容匪類竟有與馬世圻通同作弊之事各犯供據鑿鑿不能掩飾朕又密諭李衛於審訊定案之時留意保全勿使罹於重罪蓋猶諒其交結黨逆之心不過瞻徇情面之所致且范氏一門現今為大員者止范時繹范時捷兩人耳勲臣後裔漸至零落朕心不忍所以委曲成全之者至矣范時繹到京朕不肯令其罷斥廢棄特命料理太平峪吉地工程以

為効力自新之路適因北河總督不得其人於是命伊
前往膺茲重任伊出京之時朕面加訓勉伊自陳感恩
悔過願圖後効情詞懇切豈料范時繹下愚不移以本
身專司之務又當伏汎危急之時田文鏡所委各員俱
上緊搶護而范時繹安坐於旁竟同陌路視國事如升
髦視民命如草芥此等負恩溺職之愆在他人尚且不
可況范時繹之身乎著革職將一切工程交伊加緊防
護俟伏汎過後拏送來京將伊從前所犯罪案悉行查

出從重定擬具奏部議歸於張雲如案內論斬十一月
奉

旨釋放授鑲藍旗漢軍副都統十年四月授工部尚書兼
鑲黃旗漢軍都統七月兼管刑部事尋

命兼管兵部事不必再兼刑部十一年兼內務府總管十
二年

上以時繹玩愒性成草尚書任十三年四月侍衛保柱又
以時繹行賄銷事叅奏

詔交部治罪尋遇

赦釋放乾隆六年卒

楊廷璋

楊廷璋漢軍鑲黃旗人世襲佐領雍正七年由筆帖式授工部主事遷員外郎中十一年遷廣西桂林府知府乾隆二年遷左江道十五年擢按察使二十年遷湖南布政使二十一年擢浙江巡撫二十二年

上南巡

賜以詩曰監司經久任自是悉民情要以能倡率寧惟
貴潔清艱難九年蓄生聚五方盈饑溺吾心切勤哉

撫卹誠

諭曰西湖之水海寧一帶田畝藉以灌溉今聞沿湖多
有佔墾將來湖身日漸壅塞海邑田畝有涸竭之虞
於水利民田均有未便除已經開墾成熟者免其清
出外嗣後不許再行侵佔廷璋尋奏此項田地多礙

水道若仍准存留恐日漸淤塞請概令開挖歸湖
照蘇堤式沿岸栽柳以防侵佔根株盤結亦可固
堤

上嘉之二十三年三月奏請仁和錢塘蕭山三縣江塘
照海塘例以二十丈為準按段編號立石仁錢二
縣江塘除民房堤岸外餘二十餘里照海塘例每
二里設堡夫一建堡分防從之九月

諭曰戶部據楊廷璋咨梁詩正現在丁憂應否仍在家

食俸因為具奏請旨甚屬非體現任官員遇有事故
尚即停俸其在家食俸者自不待言此非為節用乃
教孝之大經也國家優眷臣工特昭異數梁詩正曾
以尚書協辦大學士豈每歲必需較此俸入者料梁
詩正身為大臣且現處苦塊中必不至鄙陋見小若
此楊廷璋或據地方官之請輒為咨部則不惟不知大
臣養廉之義且獨不為梁詩正稍留地步耶楊廷璋
不免有心徇情著交部察議尋議降二級留任二十

四年三月奏言台州府屬太平縣黃巖場沿海未墾沙塗徹底清查於適中地立界迤南者歸甌迤北者歸民築塘試種戶以百畝為率分限起科可得腴產十萬畝得

旨嘉獎四月授閩浙總督十一月奏言內地洋船赴番貿易每冒混請照臣飭屬查明換給的實姓名年貌執照查對相符方准放洋回棹時人數缺少即嚴究勒限追回以杜越販偷漏

諭勗其實力整頓十二月奏言臺灣穀賤妨農內地歉收民人每偷渡就食查禁終難盡絕不若酌寬米禁內地米增價必平減應請往來臺廈之橫洋船每船准販米二百石穀倍之糖船照例准帶食米六十石米船自臺灣鹿耳門出口收入泉州廈門編號給照開報米數令商及船戶呈驗繳銷如所議行二十五年奏請水師副將叅將照陸路例不准以本省人補本省缺遊擊都司守備等官照陸

路守備例以隔府別營缺題補部議允行先是督
臣楊應琚因臺灣地近番飭查勘按界挑溝築土
牛以杜私墾至是廷璋奏請酌定章程一彰化縣
沿山番界車路旱溝外各有溪溝水圳山根為界
其無溪圳處則挑溝築土牛為界淡水廳一帶前
僅於隘口立石今酌依山傍溪並挑溝堆土分界
一彰化縣沿邊定例番地聽番自墾如新截入彰
化界內廣福寮等十四處並舊界內廣福新莊等

五處及新舊界內兼有之萬斗六一處應照例還
畚耕管但畚黎少諳耕鑿佃民又遷移失業今酌
議除畚民自耕田均照產管業陞科外至柳樹浦
一處該畚得價賣出應入官其廣福寮等處以各
社通事土目為管事以各壑戶為佃人照臺例分
別納租餘粟勻給衆畚一彰化沿邊設隘寮十處
淡水設十八處其守隘兵糧彰化於該畚社租粟
內撥給淡水向無租粟各社曠埔未壑者尚多應

查出報壘以資隘丁口粮疏入報

聞二十六年三月奏言鳳山縣屬阿里港諸羅縣屬斗
六門地扼要請將鳳山縣萬丹縣丞移駐阿里港
臺灣縣新港司巡檢移駐斗六門從之五月廷璋
同福建巡撫吳士功叅奏提督馬龍圖借用公項
銀聞臣等察知往盤將銀數歸補應照知人欲告
而自首例減等定擬

上責其辦理錯謬於馬龍圖舞文掩飾置之不問究係

先出何人之意著據實明白迴奏廷璋覆奏定案時
係臣主稿而審辦則吳士功為政

勅草士功職發巴里坤効力廷璋草職從寬留任又叅
奏黃巖鎮總兵林洛受網戶贓派兵代為守網致
淹沒兵丁並捏報匪船掠刦

命草林洛職定罪如例二十七年

上南巡

賜以詩曰西粵昔開府南閩今建牙兼知亦舊制勝任

得卿嘉政有葦藜感身無大耋嗟老成方倚賴調攝
意須加十二月奏言湖州府藉太湖為尾閭今烏程
長興所屬淩港淤淺請開濬寬深俾歸太湖港口
詔如所請行二十八年十月加太子太保十二月授

體仁閣大學士仍留總督任二十九年三月奏言晉
江縣屬之西倉地處海濱乾隆五年移駐同知一
員距縣寫遠請將同知移駐石獅街較西倉更為
適中從之時廷璋來京

陸見福建水師提督黃仕簡奏廈門索出入船隻陋規
文武衙門朋分收受請

簡大員清查

上命尚書舒赫德侍郎裘曰修前往尋查得廷璋令歷
任同知代購物未經發價狀

諭曰舒赫德等查訊道府廳縣供有與總督楊廷璋墊
買物件銀兩此項並非黃仕簡前奏溫泰所開總督
一萬巡撫八千之本文係屬案外支節但既經訊出

自不應置之不問舒赫德等應向溫泰究詰一切收受實據如果該督一萬之數實無指証而現在墊買之項特係府廳以陋規為之墊辦在該督原有應得之咎朕亦不能為之迴護即審擬之大臣亦安得謂之吹求督撫等以上司而派委屬員即已自干不合之咎況價值更有賠墊情事既確安得復貸其處分現今該督回閩舒赫德等可就近詳悉覈對不難立見分曉即楊廷璋亦不能稍存諱飾也六月舒赫德等奏

仕簡所開一萬八千之單屬虛洋行所開督撫衙門八千圓係行戶年例貼費其各員代廷璋買物貼價亦係各員名下陋規不在八千圓數內

諭交部嚴加議處解任來京候旨尋議革任奉

旨從寬授散秩大臣

諭曰楊廷璋令屬員代買人蔘珊瑚珍珠等物衆供食同固已毫無疑義若不加之懲創則他省或致效尤滋甚豈可為訓朕特念楊廷璋年齒就衰平時尚能

實心任事不忍遽加擯棄此朕格外加恩薄懲示警
十月授正紅旗漢軍都統十二月授工部尚書三
十年六月署兩廣總督三十一年四月小鎮安土
司怕懷隘外有被交趾攻散之沙匪竄入官兵緝
獲廷璋奏俟審明押赴隘上照會該國王遣頭人
公同正法未幾交趾夷目報該國隘口聚匪搶掠
現督兵擒捕懇內地堵截廷璋復奏
聞派將弁嚴守卡隘不使外匪竄入

論曰楊廷璋此論似是而實非交趾素屬恭順謹守藩
服原不宜無故加兵即其現在勦捕夷匪並未干涉
內地亦不過攔其竄逸而止設夷匪竄入隘口自當
協力擒捕付彼處分以示懷遠之道或交趾兵目藉
緝匪為名擅至邊境滋擾豈可輕縱不究僅以驅逐
出口了事又或內地人犯逃匿彼境即應向其索取
倘索而不予即當聲其罪而追攝之又豈可置之不
問乎此等邊地夷情惟應審度事理之當辦與否因

時制宜若務為持重鎮靜之說則養癰貽患其弊有
不可勝言者將此通諭各督撫知之五月崖州定安岐
黎糾眾滋擾客民廷璋檄鎮道擒捕治罪奏杜後
患事宜一客民久居黎地有田園廬墓者自為一
村編保甲立甲長稽查約束一錢債非違例取息
令欠戶清還重利盤剝者追餘息充公禁客民入
黎放債一民黎交易飭附近州縣汎地設墟場定
期交易一令黎峒總管曉諭熟黎普行薙髮一貢

木貢香派總管黎頭運聽地方官選買給價一凡
出入黎峒之人盤詰明白放行遇催徵錢糧公事
票差黎頭飭令交出禁差役入黎滋擾得

旨允行七月奏言鎮安府屬小鎮安土司原設土巡檢
職微難以控制應與歸順州湖潤寨州同一併裁
汰改設鎮安府通判駐劄小鎮安整飭化導宣化
縣那南寨與金城寨相近併歸金城巡檢管理即以
那南巡檢改為湖潤寨巡檢小鎮安之南隴連山

地險僻請於界連安南及土富州之那波者賴者
欣等三村各建卡撥兵怕懷大隘近安南為小鎮
安門戶應撥兵巡緝添設把總一打面梁壤接滇
省應將南燕山一卡移建以資扼要部議允行十
二月

命赴永昌助理軍務三十二年二月奏言總督楊應琚
疾已愈臣遵

旨仍回粵東三月授刑部尚書三十三年正月

命紫禁城內騎馬廷璋時年八十

御書協中延慶額

賜之八月授直隸總督加太子少保十月奏言正定縣城西南近河向築堤壩今秋濤沱驟長逼城應於斜角堤頭增築新堤五百七十六丈至栢棠閘止環抱禦水並拆修護堤埽壩斜角堤東接築挑水壩五座河神祠前築魚鱗壩俾河流仍復舊軌又奏言藁城縣東北濤水汕刷應自西北城角起順

岸築埽工三百六十丈用排椿葦埽鑲築堅厚埽
後加築土埧保護城垣又奏勘任邱沿淀情形楊
各莊等處極窪水漲難洩請改種稻田文安大窪
東面界連大城縣舊有堤埧滹滏盛漲注子牙河
水高堤頂宜加倍修築文安積水未涸應於龍潭
灣等處開堤洩放並從之三十四年正月請撥通
倉米十二萬石運各災屬平糶

詔加恩撥二十萬石以為加賑糶借之用四月奏言滹

沱河故道由晉州之東張岔口東流經東鹿之木
邱傾井等村入深州歸衡水縣入滏陽河合流岔
河由東鹿之小王村至冀州亦會入滏河乾隆二
十四年南徙由東鹿西南之曹家莊至寧晉縣之
營上村歸滏河以至舊河淤墊東鹿向距河遠上
年滏水盛漲河行故道木邱傾井等村復成巨浸
河面寬深間有應裁灣取直處已開挑完竣惟東
鹿護城堤拾年久坍塌亟應修築奏入報

聞十二月奏言四旗廳現存米萬九千餘石久貯虞致霉朽熱河廳應購米萬三千餘石定價每石一兩九錢九分不敷採買查四旗原買米價每石八錢四分請將四旗現存米撥給熱河既無需增價而四旗又可照原價稍盈於兵精帑項有益

詔如所請行三十五年春

上巡天津

賜以詩曰總督而兼巡撫事歷來保定此掄賢八閩威

望原騰舊三輔循聲俾繼前練士安民惟要矣疏河
導淀尚勤旃春巡本務茲愍示供帳寧當謂力宣閏
五月以北運河一帶淺阻請將運通船糧酌留天
津北倉

命截留二十萬石七月奏言武清東安寶坻寧河永清
香河六縣雨多被淹貧民待哺甚殷復請將被災
六分以上者八月內先普賑一月俟冬初加賑並
請照例兼用銀米其米即於天津截留漕糧內動

撥從之

詔再撥通倉米二十萬石部庫銀五十萬兩以資分給
尋奏言各屬常平穀尚未買足今歲天津舊欠復
經蠲免各州縣倉廩所存尚恐不敷得

旨加恩撥通倉米二十萬石俾得寬裕賑給貧民口食
並資接濟九月奏言唐三營官倉向貯米萬二千石
乾隆四年熱河總管巴圖奏定五年一次運至熱
河喀喇河屯貯倉搭放兵餉仍將熱河同知添買

兵米撥萬二千石運赴唐三營倉歸款五年後仍照前運至熱河喀喇河屯倉往返徒滋糜費請將唐三營米於此次運喀喇河屯後毋庸再為撥抵將唐三營空倉歸熱河四旗二廳分貯採買米穀唐三營原設千總一兵三十移駐布達拉廟又奏言古北口為畿輔重鎮兵糈向藉口外販運應請撥熱河廳穀六千石四旗廳穀四萬石喀喇河屯穀一萬四千石運古北口建倉存貯并移駐滿缺

同知一員經理停密雲縣採買兵米即於古北口
倉內動支並允行十月奏直隸各屬需賑銀約八
十餘萬兩前所撥不敷得

旨著加恩於部庫內撥銀三十萬兩又奏潯沱河向設
歲修之項因河流南徙停止今河又北徙請仍撥
項購料隨時修防奏入報

聞十二月奏言熱河應買明歲兵米時價稍昂請撥八
溝米運熱河備用俟來年價平買補還倉從之三

十六年八月奏言蒙古游牧地方向禁民墾而克什克騰隙地無礙游牧蒙古兼可得租養贍請照土默特佃種收租例除礙游牧者不准私墾餘聽自便廷議允行十月授刑部尚書十一月恭遇

孝聖憲皇后八旬萬壽廷璋與九老之列

賜遊香山十二月卒三十七年正月

諭曰楊廷璋久任封疆老成歷練前因年逾八旬畿輔事繁恐未能鉅細周到是以用為刑部尚書見其精

力尚未頽邁於部務自可從容經理乃去冬偶感風痰遽聞溘逝深堪軫惜著加恩晉贈太子太保應得卹典察例具奏尋

賜祭葬如例謚勤愍

范時綬

范時綬漢軍鑲黃旗人大學士文程孫雍正十年由筆帖式補戶部主事累遷郎中乾隆十三年授山東濟東泰武道十五年遷安徽按察使十六年

五月遷湖北布政使十月署湖南巡撫十七年九月疏言湖南常平倉穀廷議照雍正年間除額存七十萬二千餘石尚溢五十五萬餘石前撫臣開泰奏准以三十萬石另案存貯脩鄰省及本省賑恤以廿五萬石糶價存公上年撥穀十萬石協濟安徽應俟解還糶價日買補惟是湖南上年歉收平糶之穀及本年減價糶濟之穀均應籌補若再將撥運安省穀同時買補民貯必少查湖南應糶

溢穀尚存二十萬石請以十萬石撥補協濟安省
原額餘穀十萬石一併歸入另案存貯其安省解
到糶價歸藩庫報部撥用

上嘉之十月疏言城步江華綏寧三縣苗疆要缺沅江
縣瀕洞庭湖臨湘地當孔道向給養廉六百兩辦
公不敷請於地僻事簡之醴陵平江二縣各酌減
養廉二百兩武岡州安仁新化石門慈利永定等
縣各酌減一百兩分增城步等五縣養廉疏入報

聞十八年九月疏言鳳凰廳舊貯穀萬石建倉石羊哨
地方兵民借糶以山路維艱又倉廩不敷現貯穀
七千石缺額三千石未經買補而鎮算鎮土苗雜
處並無貯積請將應買額穀三千石於鎮算鎮建
倉存貯支領較便得

旨俞允又疏言長沙等處未報陞科田畝已委員丈量
照例起徵湘陰益陽等縣續查出私墾千餘頃均
瀕洞庭旱歲間獲收成一遇水漲呼賑籲免無補

正供請照峯頂湖澤之隙聽民耕種例暫免陞科
俟成腴壤日起徵至洞庭為受水之區私垸日增
則水口日逼上流受害已飭將垸田碍水道者勸
諭拆毀存案嚴禁添築俾水得暢流報

聞是月調江西巡撫十九年以病疏請解任

諭留任調理二十年二月

上以巡撫任重事繁恐時綬精力未充致滋貽誤

命來京

陞見旋以病免二十一年十一月起授戶部侍郎二十二年授正黃旗漢軍副都統二十三年七月署正白旗滿洲都統十月奏請赴西路屯田効力

賞戴花翎馳駟前往二十四年八月副都統定長劾奏副都統滿泰貪婪敗檢及時綬役兵漁利狀

命御前侍衛安泰往會審訊滿泰貪婪屬實時綬家人藉端營利時綬不知情所開店房用官匠一餘皆自雇並未役兵

諭曰滿泰情罪確實已命於該處正法范時綬係特差辦事之人理應潔已奉公乃營私求利即治以重罪亦所應得但較之滿泰尚可少從未減著革職交與定長令其効力贖罪二十五年由關展運羊至阿克蘇

賞叅領銜二十六年六月由烏魯木齊運羊至伊犁並懇辦送回空駝隻後仍赴伊犁効力

諭曰范時綬前因解送阿克蘇羊隻妥協曾賞叅領

職銜此次更屬奮勉著加恩授頭等侍衛烏魯木齊
亦有應辦事務仍在原處行走不必又往伊犁二十八
年

詔回京二十九年授鑲藍旗漢軍副都統三十年閏二
月授吏部侍郎六月往哈爾沙爾辦事三十一年
正月授左都御史仍留辦哈爾沙爾事三十二年
五月授湖北巡撫十一月

召見

上以時綬奏對時神氣短弱恐於封疆重寄難任煩勞
命留京另用三十三年三月授正白旗漢軍都統六月
授左都御史三十四年補公中佐領三十五年閏
五月授工部尚書三十六年二月調刑部尚書十
月

命專辦正白旗漢軍都統事務四十七年卒子宜恒現
官正藍旗漢軍副都統署工部侍郎

英廉

英廉內府漢軍鑲黃旗人姓馮雍正十年舉人由
筆帖式授內務府主事乾隆二年

命往江南河工學習補淮安府外河同知六年丁母憂
服闋補直隸天津河捕同知十年遷大名府知府
十四年總督陳大受委查民典蒙古地畝十五年
三月擢永定河道六月總督方觀承奏五月三
十日南岸三工大堤淤溝埽鑲被沖水泛月堤英
廉匿不報聞六月初二日猶稟稱各工保護平穩

及淤口刷寬復稟稱淤溝於初三初四日形勢漸
變汕刷堤頭捏飾廻護貽悞要工請

旨草審英廉以南岸三工於五月三十日淤溝漲滿月
堤漫開本日即行稟報六月初二日水漲開放十
壩加築子堰復稟報各工保護平穩係指上下兩
岸各工而言並未指南岸三工而言至十六年五
月讞久未定觀承復以英廉輾轉遷延疏請

特遣大臣查審

命尚書舒赫德往勘尋奏英廉供稱上年五月三十日
到工大堤淤溝汕刷月堤衝開因思大堤淤口堵
築尚易所以祇報月堤漫溢非有心捏飾至從前
供詞支吾實因畏罪非圖狡賴查英廉與廳汛各
員上年汛前並未將淤溝先事預防致水漲埽鑲
衝刷溝頭坍塌已屬疎忽其原稟內不言正壩已
開轉稱鞏固無恙不言月堤衝刷由於正堤先開
轉稱月堤因風雨衝漫咎實難辭應將堵築漫口

銀着落英廉勒限分賠

諭曰據尚書舒赫德會同總督方觀承查審永定河道英廉捏飾悞公一案英廉身任河道隄工乃其專責遇有衝決寔無所辭咎但其初報月堤漫口而諱言大堤衝刷或係希冀潛行堵修以圖完局該督據稟即應一面查明一面具奏乃方觀承上年六月初二日奏摺內祇稱一應工程平穩並不將月堤漫口之處據稟入告亦未必不思以無事為福是以英廉得

輾轉翻變日久延挨朕彼時早鑒於此即以報災不
可存粉飾之意批示方觀承亦應服朕之洞燭隱情
自知引咎矣至摺內稱英廉未將淤溝先事豫防以
致大溜直注此語殊未足服英廉之心伊到任未及
兩月淤溝即有疎忽亦係僧保住任內之事未可以
此為英廉罪案朕辦事一秉虛公既確見情形如此
不可不明白宣示然以督臣劾一道員自叅自審何
難任意輕重竟行入罪定案仍懸案經年未敢迴護

已見遽為審結俟特遣大臣前往會同查辦是其心
尚知所警畏亦朕辦理庶政務求至當不容稍存含
混之明驗也英廉等已經革職所有糜費工程銀兩
自應照例分賠還項未幾

命在高梁橋迤西稻田廠効力尋授筆帖式十七年授
內務府主事歷遷戶部員外郎吏部郎中二十年
兼佐領二十一年調戶部銀庫郎中二十二年兼
辦提督衙門事尋調戶部郎中二十五年擢內務

府正黃旗護軍統領二十六年二月授江寧布政使兼管織造事英廉以父年老懇留京

命賜二品銜十一月授內務府大臣二十七年三月署戶部左侍郎兼管三庫事務九月寔授左侍郎二十八年丁父憂八月

命會勘順天府屬及宣化永平遵化旗地核定租額二十九年

諭曰英廉奏確查佃戶一摺甚為得理即著英廉錢汝

誠會同該督詳悉妥辦務俾農民均霑寔惠三十年
兼署錢法堂事三十一年疏奏丈出

盛京旗民餘地請

旨飭辦

命將軍府尹定議三十三年管崇文門稅務及

武英殿事務三十四年二月

諭同尚書託庸等總理津送出征緬甸兵事宜十二月
充

經筵講官三十七年以鞫寔雄縣知縣胡錫瑛劣款
擬罪寬縱降一級留任三十八年三月充四庫全
書館副總裁四月署步軍統領九月

諭獎其辦理送兵妥協議加一級是月遷刑部尚書兼
辦戶部侍郎正黃旗滿洲都統事務十月授議政
大臣

賜紫禁城內騎馬三十九年七月太監高雲從向左都
御史觀保侍郎申保倪承寬吳壇洩漏道府記載

侍郎高樸奏

聞

諭曰英廉係內務府大臣於內廷諸事最為熟悉此等情事豈有不知乃高樸尚有見聞豈英廉竟得諉為不知朕開誠布公以待諸臣而諸臣轉不能竭誠盡力以圖報効清夜自思良心安在英廉着革職從寬留任復以審觀保等四人交結高雲從罪刑部擬斬候過當

諭責英廉另議九月留京辦事四十年

諭曰日前總管內務府衙門奏商人義和泰呈請展限交銀一案是日召見金簡詢係何人收呈奏稱不知何人數日後復召見邁拉遜詢及此事奏係六阿哥收呈交衙門公辦又數日復詢之英廉則稱忘係何人所收衙門中同辦一事豈有不知呈所從來及遺忘何人收呈之理不過邁拉遜據實覆奏而英廉金簡不免含糊隱諱耳蓋英廉金簡在內廷年久心靈

曉事明知阿哥不應收呈恐言之於阿哥有礙故不肯明言殊屬非是英廉金簡著交部嚴議尋部議草

任

命寬免仍註冊四十一年正月署戶部尚書兼署協辦大學士十一月時英廉年七十

賜斗南介景額四十二年三月署步軍統領充纂修日下舊聞考摠裁五月充翰林院掌院學士四庫全書館總裁尋

命協辦大學士十月調戶部尚書仍兼管刑部事務疏
請將內務府筆帖式照吏部例三年考試一次分
優劣陞黜下內務府議行四十三年疏言直省督
撫提鎮等標額設馬步守兵遇有軍流遣犯銅銀
餉鞘過境均須護解盤費及脩補軍裝器械各費
向於兵餉攤扣營弁藉端扣派請將各省朋扣銀
暫停一二年入撥分標營生息永作差費下軍機
大臣議交直隸督撫約計該省每年差費若干於

閒款奏給得

旨允行四十四年暫署直隸總督四十五年三月

諭曰英廉係內務府漢軍人協辦有年着補授漢大學士
缺仍管理戶部事務四月以失察書吏作弊革職
留任四十六年正月暫署戶部尚書及步軍統領
事十一月暫署直隸總督疏稱直隸大州大縣
多虧空俱非近年所積若及時籌辦限以四年尚
可彌補

命新任總督鄭大進會同軍機大臣核辦四十七年二月以審擬甘肅鎮迪道巴彥岱受賄罪扶同率結

議草任

詔寬免三月署步軍統領四月以

恭祀

雲壇祝版筆畫模糊下部議草任

命免其草任降級仍註冊八月加太子太保十月復署直隸總督疏言直隸各倉賑卹後儲穀未能足額

請將天津北倉截存漕米九萬餘石撥補如議行
四十八年正月奏直隸未完耗羨尚有實欠在民
銀三萬餘兩

詔加恩蠲免七月以病疏請開缺

諭在家專心調養不必開缺八月卒

諭曰太子太保大學士英廉老成練達奉職恪勤翊贊
綸扉總司讞典寔心宣力倚毗方殷春間偶聞患病
即遣醫診視並屢經降旨諭令加意調攝以冀就痊

近因病勢轉增懇請開缺復降旨令以大學士在家
專心養病尚冀痊愈後仍照舊入閣辦事今聞溘逝
深為悼惜着派散秩大臣一員帶侍衛十人前往奠
醑並加恩入祀賢良祠仍賞銀五千兩俾治喪事其
任內降革罰俸處分均予開復應得卹典察例具奏
賜祭葬如例諡文肅

范時紀

范時紀漢軍鑲黃旗人大學士文程孫乾隆八年

由廕生分工部學習補員外郎十三年管理街道
廳尋陞兵部郎中十五年授廣東糧驛道十六年
署廣東鹽運使未幾實授十七年署按察使二十
五年引

見

諭曰范時紀以俸滿送部引見念該員為漢軍世族現
在伊家並無大員范時紀著留京以副都統用六月
署鑲紅旗漢軍副都統十月寔授二十六年三月

授工部侍郎十月疏言工部各項工程掌印同各員一體派辦但掌印有稽查稿案之責兼派工程既難留心稿案且遇工程緊迫差分兩地責無專成請嗣後但於散走司員內揀派四司兩庫掌印不必兼派如該員辦事實心稿案無誤凡遇保題保送先儘揀選又尚書秦蕙田奏准派委工程宜分別銀數多寡以郎中等官籤派到任未及一年者扣除伏思一年中既未經歷練則一年外豈即

能熟諳請嗣後到任未及一年者除緊要大工不派外其滿郎中員外在一百兩以內主事五十兩以內筆帖式三十兩以內估驗承修各工均令簽派俾隨時學習漸次諳練俟一年期滿後一體派辦詔如議行二十七年奏京南霸州文安固安寶坻天津靜海滄州青縣等處地低遇水多之年即廣種秧稻水小仍可布種秋禾黍稷即不能皆成稻田或行於數縣數村亦不無裨益應增隄埝處所一體

添築以護民田資宣洩務使溝洫深通如有急公捐築者予以議叙并即以工代賑

諭曰此不過以近來一二年間雨水稍多竟似此等地畝素成積潦之區殊不知現在情形乃北省所偶遇設遇冬春之交晴霽日久便成陸壤蓋物土易宜南北燥濕不能不從其性倘將窪地盡令改作稻田當雨水過多即可藉以滯用而雨澤一歉又將何以救旱從前近京議修水利營田未嘗不再三經畫乃始

終未收實濟可見地利不能強同亦其明驗但范時
紀既有此奏著將原摺抄寄方觀承閱看或有可以
隨宜酌採者該督細心籌議具奏尋觀承議京南惟
霸州東北煎茶鋪等數村及文安之畢家房朱家庄
等十數村保定府屬安州之壘頭村新安縣之馬家寨
近濱窪地俱宜稻遇水歉仍聽種黍粟固安寶坻等
處未便概施從之三十年調倉場侍郎三十二年
調戶部侍郎三十四年兼佐領三十六年六月以

恩賞八旗兵丁鰥寡孤獨錢糧時紀未經詳核含糊入奏議降三級調用

詔從寬留任十二月奉

命祭告太昊伏羲氏陵三十九年兼署禮部侍郎尋仍調倉場侍郎四十一年三月疏奏臣前赴通惠河查看沿河緯道修艚船隻閱各閘所換閘版儘可改作橋梁之用不堪改作亦應變價歸公隨檢舊案向無回殘且未定更換限期除慶豐平上平下

過水關等四閘舊板向俱改作大通橋朝陽門東
直門三閘閘板照舊辦理外至通流普濟並下游
之南浦減水等四閘每年更換新板舊板並不改
用亦不變價殊屬糜費請將通流等四閘舊板即
作為本年應換橋梁之用不准另開工價寔在不
堪改作者亦令坐糧廳驗明變價為添置新板之
需並將各閘閘板定限五年外令坐糧廳驗明結
報更換下部議行四十二年調禮部侍郎四十三

年正月

諭曰范時紀年力漸衰不勝侍郎之任着以副都統用
尋卒

欽定八旗通志卷一百九十三

欽定四庫全書

欽定八旗通志卷一百九十四

人物志七十四

大臣傳六十

漢軍正黃旗一
吳景道

雷興 李思忠

金維城 金玉和
彭有

德 朱國治

高爾位

李蔭祖

耿繼茂

李

林盛

周卜世

李思忠

子塞白理

李思忠先世居鐵嶺父如挺明寧遠伯成梁之從姪也初官太原同知後罷歸寓居撫順我

太祖高皇帝天命三年大兵克撫順思忠來歸明年師克
開原鐵嶺如樅家居與弟如梓及子一忠存忠俱
死焉六年

太祖定遼陽

敕思忠收集其族人之流亡者思忠招徠戶口並復故業
上深嘉之授佐領予騎都尉世職尋以擒獲間諜功晉世
職至三等輕車都尉天聰三年

太宗文皇帝親統大兵征明取遵化

命思忠與叅領英固勒岱留守既而明將謝尚忠等來攻城思忠開門出戰敵兵三進三却時大安口三屯營等十一城既降復叛明監軍道張春合步騎犯灤州貝勒阿敏怯不赴援灤州失守士卒奔潰阿敏大驚并檄遵化守將棄城東歸值遵化城中火器營猝為敵火箭所焚衆心恐懼思忠戒勿輕動徐結陣出城招明官之降者四人以行身自為殿及出關無一亡失者既歸

上命議阿敏等棄城罪以思忠為偏裨非能主其事而貸之五年隨都統楞格哩等征明南海島未至遇明兵戰於茨榆坨擒十一人獲戰艦五敵復率眾來奪思忠迎戰破傷領不為動仍奮擊敗之晉世職為一等輕車都尉九年考察戶口思忠所轄之沙河堡燕郎寨增丁百十有三晉爵三等男尋奉

命駐守蓋州城崇德二年疏言遼陽各城今悉調丁夫修築而蓋州城垣又復積侈部議丁夫不足應調餘

丁供役查蓋州地處邊陲軍士防守靡寧其餘丁
僅堪耕種今若棄農就役不過用土補苴而城工
不堅歲功亦廢不若就應修處所勤加巡視守護
俟各城歲工再集丁夫造軌修築則城垣永固而
人得及時盡力農事得

旨如所請行七年以漢軍分隸八旗思忠隸正黃旗順治
元年隨豫親王多鐸征流賊李自成破潼關尋隨
征江南克揚州招撫江北得十州縣三年二月奉

命為西安駐防副都統三月擢陝西提督七年八年三遇恩詔晉爵一等男兼一雲騎尉十一年以年老致仕十四

年七月卒

賜祭如例子五人次子蔭祖別有傳第三子顯祖襲爵

世祖賜名塞白理授二等待衛任叅領

聖祖仁皇帝御極擢隨征江南左路總兵官康熙六年遷

廣東水師提督八年改浙江提督招降海賊鄭錦

之偽寧遠將軍林伯馨偽都督施轟等十三年逆

藩耿精忠反塞白理疏言耿逆交通三桂結連鄭
寇沿海所在賊踪皆可揚帆直入而江南之崇明
孤懸海外尤為可虞又黃巖圍困日久請援孔亟
寧海象山新昌餘姚四縣賊眾蠭起恐寇據寧海
斷我饟道請速援台州護守寧波疏入並奉

敕授方畧調兵防禦尋隨貝子傅喇塔擊走賊將曾養性
等於台州十四年九月卒於軍年四十有三

賜祭葬如例祀浙江名宦祠子李鉞龍爵

金玉和

金玉和遼東人後隸漢軍正黃旗

太祖高皇帝天命四年征明取開原還軍界藩玉和時為

明千總與同官王一屏戴集賓等率二十餘人來

降授叅領予三等男爵

太宗文皇帝天聰五年擢禮部承政六年

上幸演武場

閱兵玉和同額駙佟養性等率所轄漢軍掇甲列陣試礮

得

賜鞍馬八年考績晉三等男崇德元年都察院劾奏玉和
與吏部承政李延庚互舉子弟事坐徇私罷任降
世職為三等輕車都尉二年從

上征朝鮮旋隨武英郡王阿濟格攻明皮島以前進之水
師失利玉和不趨援論死

上以其有率衆投誠功免死革世職四年復授叅領六年
隨大軍圍錦州屢擊敗明兵時明總督洪承疇部

衆分據松山南三臺王和率兵攻克之盡殲其衆
敵乘夜犯我壕塹奮擊却之斬級五十七年錦州
下復率兵攻克塔山城敍功予騎都尉世職八年
隨鄭親王濟爾哈朗征明寧遠攻克前屯衛中後
所二城順治元年正月擢工部參政二月敍寧遠
功晉三等輕車都尉八月以副都統隨征河南署
懷慶總兵官時流賊李自成為大軍追逐竄陝西
其黨二萬餘劫掠河南十月犯濟源縣王和統兵

往援至則城已陷夜半遇賊力戰中流矢歿於陣
事

聞下部議卹追晉二等男以其子維延襲雍正七年入祀
昭忠祠

吳景道

吳景道遼東廣寧衛人後隸漢軍正黃旗

太宗文皇帝天聰時授吏部啟心郎崇德元年改都察院
理事官疏劾刑部理事官卽位貪污不法狀鞠問

得實黜卽位為民追贓免死尋

賜內院學士都察院叅政諸臣人戶牲畜有差景道得一

等優

賜卽位銜景道劾已旋誘都察院筆帖式李民表同居令

以八款訐景道於法司鞠之悉誣李民表伏誅籍

卽位半產入官景道以失察李民表違禁移居他

旗罰如例順治二年授河南布政使尋擢河南巡

撫時河北初定河南五府餘寇未靖寶豐宋養氣

新野陳蛟商城黃景運等各聚衆數千人侵掠城邑景道檄總兵高第副將沈朝華等分路捕剿養氣蛟景運並就擒伏誅四年鄖陽賊王光泰率衆千餘犯浙川景道遣叅將尤現等與總兵張應祥合兵擊卻之五年羅山縣土賊張其倫據雞籠山寨結黨出掠景道遣都司朱國強佟文煥等分兵截擊攻破賊寨擒其倫及賊黨朱智明趙虎山等以奏得

旨官兵蕩平賊寨有功人員察明敘賚生俘賊首張其倫等著即正法是年山東曹縣賊范慎行等煽誘河南寧陵商邱考城虞城儀封蘭陽祥符封邱諸邑糾衆剽掠屯據黃河北岸景道檄高第率兵搗賊巢屢戰俱捷賊退據長垣第進蹙之賊竄蘭陽景道遣佟文煥率兵搜剿斬千餘人追至曹縣賊列柵拒守景道檄總兵官孔希貴自衛輝由胙城進兵斷其東路遣遊擊趙世泰都司韓進等率精騎疾馳

分道夾擊師至東明賊分三路迎拒我軍左右合
擊殲其勁兵數千餘衆潰散獲賊渠范慎行誅之
得

旨嘉獎下部議敘加兵部右侍郎七年晉本部尚書八年
陝西商州賊何柴山等嘯聚突至盧氏縣夜襲趙
世泰軍高第統兵扼剿賊敗奔商南景道檄張應
祥撲滅之九年以堵築汴河決口工竣與河道總
督楊方興並

賜鞍馬冠服及白金十年八月以老疾乞休得

旨吳景道撫豫有年清勤素著據奏年逾七十積病日深
情詞懇切准致仕仍下部議

加恩晉一級廕一子入監十三年三月卒年七十有五

賜祭葬如典禮贈太子太保謚愍僖祀河南名宦

雷興

雷興遼陽人後隸漢軍正黃旗

太祖高皇帝定遼東興以諸生選直文館

太宗文皇帝設科取士興中式舉人授秘書院副理事官

崇德元年

特試內三院學士舉人生員興名列二等

賜人五戶及牲畜等物尋任都察院理事官順治元年十

月授天津巡撫時土賊李聯芳張成軒嘯聚滄州

南皮間興同總兵婁光先督師進剿成軒等竄遁

我兵追至海口扼其去路賊驚潰投水死者大半

興復遣兵搜捕餘黨斬其渠魁散脅從者歸農滄

州南皮一路悉平疏言大沽海口為神京門戶請
置戰船以備海防下所司議行二年四月調陝西
巡撫時陝西當流賊李自成擾亂後戶口散亡興
招徠撫綏之疏述其狀得

旨嘉獎屢

賜冠服裘馬三年肅親王豪格奉

詔統師由陝西進征四川師未至流賊孫守法等掠興安
興慮賊勢猖獗急移潼關兵三百駐防商州復值

叛鎮賀珍掠漢中興密檄漢羗道胡全才設備固
守以待大兵及肅親王統師至賊皆竄遁是年九
月興疏言隴州關山為河西咽喉西安藩蔽山險
林深盜賊易於出沒應設兵分防控禦臨洮鞏昌
與西番為隣請暫留屯軍以防邊隘並下部議行
四年四月以疾解任十年八月起授河南巡撫未
至任卒

賜祭如例贈兵部右侍郎廕一子入監祀陝西名宦祠

金維城 子世礪

金維城漢軍正黃旗人總兵金玉和之子也初由

侍衛授叅領

太宗文皇帝崇德元年大兵征明錦州維城奉

命同副都統金礪督運軍糧三年任兵部副理事官四年

擢鑲白旗漢軍副都統五年隨鄭親王濟爾哈朗

圍錦州明兵自城出戰維城同都統石廷柱率兵

擊卻先後攻克其臺十有八屢敗松山杏山敵衆

六年松山兵來奪我紅衣礮擊之遁七年錦州下
移師攻克塔山杏山城維城皆在事有功予雲騎
尉世職是年六月調正白旗漢軍副都統兼任兵
部叅政十二月奉

命率漢軍馬步兵四百駐防錦州八年隨鄭親王征明寧
遠克中後所前屯衛二城敘功晉世職為騎都尉
順治元年定都燕京改六部叅政曰侍郎維城仍
任兵部侍郎兼副都統四年考績加世職一雲騎

尉五年隨鄭親王征湖廣六年攻克湘潭縣趨寶慶擊敗明桂王朱由榔將馬進忠王進才袁宗第等追剿至武岡沅州靖州俘斬無算七年凱旋得優賚遇

恩詔晉世職至一等輕車都尉九年調正黃旗漢軍副都統十年以總兵任珍擅殺懼罪行賄兵部事覺部臣均坐降革維城罷任降世職為三等輕車都尉十五年卒長子世需襲職次子世礪初任佐領康

熙十七年隨平南將軍賚塔征福建擊敗海賊於江東橋太平寨諸處十八年賊將劉國軒合眾萬餘犯漳州世礪督兵進戰中流矢歿

賜卹予雲騎尉世職孫興祚襲雍正七年以世礪入祀昭

忠祠

彭有德

彭有德漢軍正黃旗人順治元年由將材從大兵入關二年授山西大同都司尋遷遊擊管右衛路

叅將事五年十二月逆鎮姜瓖叛遣人持書招有德降有德囚其使同城守備王曰吉等陰通賊有廢弁闔某糾衆圍有德署礮石並發有德奮勇突圍奪門出妻妾子女及家屬六十餘人皆遇害馳至英親王阿濟格軍前告瓖叛狀並呈逆書隨奉令同守備梁化鳳攻大同城又率兵至右衛招撫賊衆賊於城上施礮穿有德甲不為動復雲岡威遠等堡六年十月敕大同戰功遷叅將管陽和副

將事九年十月授浙江杭州副將陽和軍民具狀
乞留下部議准以陞銜留任十一年十一月新設
大同總兵

詔以有德充補尋加署都督僉事十八年加署都督同知
康熙八年正月因老病乞罷得

旨以原官致仕十六年十一月卒

賜祭葬如例

朱國治

朱國治漢軍正黃旗人順治四年由貢生授固安
知縣洊擢順德知府霸州道十五年内陞大理寺
少卿十六年四月遷大理寺卿十一月擢江寧巡
撫明年春劾布政使陳培正庸劣累民罷之時海
賊鄭成功盤踞外洋出沒江南濱海州縣國治疏
言鄭逆未靖欲破狡窟必先度形勢賊衆負險我
師遠涉風濤其勞逸不同賊衆熟識海道我師弓
馬便捷其素習不同水師舟楫較之賊船大小懸

殊其攻取器用不同臣謂以守禦戰凡海邊江口
多設臺待賊勢困援絕乘間攻之自能擒渠獻
馘下所司議行十八年疏言海防緊要請移蘇州
海防同知於常熟移松江海防同知於上海各令
其督修沿海橋梁馬路整堡與各營汛將弁相機
策應使任專而事無歧誤從之又疏言蘇松常鎮
四府錢糧抗欠者多因分別造冊紳士一萬三千
五百餘衙役二百四十人

敕部察議部議現任官降二級調用衿士褫革銜役照贓治罪有差時有造妖言惑衆者吳縣潘應祥溧陽端應用等國治先後捕誅之康熙元年丁父憂不候代歸部議擅離職守革職

聖祖仁皇帝既親政

詔起用十年補雲南巡撫時吳三桂以平西王留守滇黔收畜亡命潛謀不軌十二年七月詭請移藩錦州上念三桂久握重兵恐滋蔓生變

特允所請

遣侍郎哲勒肯學士傳達禮至雲南經理其事三桂期以十一月二十四日啟行國治方疏請增設驛堡撥協夫馬以待遷移而三桂與逆黨胡國柱夏國相馬寶等密謀叛逆舉兵扼守關隘先期三日邀國治及按察使李興元雲南知府高顯辰同知劉崑脅之叛皆不屈國治罵賊尤烈遂遇害二十年雲南平

上命驛送國治觀及家屬回京二十一年

論曰朱國治當逆賊吳三桂反叛之初抗不從逆遂被殺害捐軀殉難深為可憫其從優議卹乃加贈戶部右侍

郎

予祭葬如典禮廕一子入監

世宗憲皇帝時入祀昭忠祠

高爾位

高爾位漢軍正黃旗人父勲明錦州衛副將從總

兵祖大壽投誠爾位順治四年舉人初任直隸南
和知縣九年四月行取授監察御史十月巡按陝
西十一年四月奏言邇來奸徒營謀委署州縣佐
貳昔之衙蠹地棍今之典史職雖卑而有父母之
呼兼有巡捕之責無職而官非該管道府受賄因
何濫委如任縣典史楊顯耀等概係積蠹快皂惡
棍鑽營代補小民莫敢誰何請

敕部行督撫確查允委官一并重處再州縣之員本府廳

官黃緣委署在府官待為同堂曲徇優容新任箱
口結舌一惟唯唯至如州縣積蠹事露鑽之府廳
府廳衙蠹不法鑽之司道恃衙門為蔽奸之藪視
小民為網中之魚統祈

天語申飭今後州縣乏員萬不能候新舊交代者須擇才
品俱優之隔府官暫署如貪汙不法道府立叅徇
縱連坐各省大小衙門及在京五城積蠹概行革
汰並得

旨先行六月巡視中城奏言官餽駟馬州縣中十無一二民應者十八九鄉愚不能自應倩之駟棍勒索遂意然後代應過軍機傳報使客郵符竟無一馬驛棍逃避仍拘民應更可異者府廳司道總兵私遣負役皆騎驛馬雖屢奉

嚴綸而官役私牌日行州縣不敢不應又不敢冊報甚至私牌內有擅批上司免報者請今後一應紙票及過往叅謁各官統禁騎驛馬非兵部火牌勘合不

許濫應違者驛傳道揭部請

旨重懲各省州縣驛馬里馬照賦役額設協濟銀兩或隣
封協銀於每季終出毫不累民甘結報部科查照
有仍前者許科道糾叅不發覺者連坐更有請者
直隸正順廣大等八府屬解運芝麻棉花二項脚
費數倍大為民害伏乞

敕部照陝省彙解藥材例責成本府不經民手部議從之
十二年六月巡按山西十三年六月條奏晉省風

獎一司道府廳衙蠹犯贓本管失察應議處一州
縣到任十日內查前任起存錢糧毋得逾定限道
府徇隱者連坐一見貨抽稅不得以無貨而包稅
無舖而納課致商賈裹足年有豐歉以有餘補不
足並下部議行十四年十月奏請布按監司內陞
未任事之先

皇上親試觀其年貌詢其政事才識兼優者令任事年力
衰邁平常者別用下部知之十五年七月遵

旨條奏興利除害事宜一齋奏縣役馬上不許擅用大小皮包以恤驛困一陞遷大小官員不許預調夫馬衙役不許出境迎接一學臣考試進黜之數不可太懸每考必確訪學霸數名按律究擬並下部議行十月巡視兩淮鹽政十六年六月海寇鄭成功犯瓜洲爾位出揚州城護解鹽課銀為總督亢得時所劾

上諭高爾位身為御史聞警即當率屬固守乃賊尚未至

先借端出城致令百姓驚逃深為可惡令解任該督撫
嚴察具奏十七年五月總漕蔡士英奏爾位於十六年
六月十六日起解課銀十四萬兩次日賊陷瓜洲
即出城送至高郵於二十日回揚賊鋒甚熾恐致
不虞於二十二日罄發庫項十一萬兩遣運判郭
顯功押解進京舊例原無鹽院親送之條緣乏兵
護親送至淮安至七月二十四日回揚下吏部會
同都察院議尋議爾位雖無城守責但聞警當協

守城池乃以送鹽課為詞兩次出城應議處事在
赦前免議得

旨俞允康熙三年三月內遷順天府府丞四年兼理崇文
門稅務十七年遷通政使十九年正月授左僉都
御史十二月遷奉天府府尹二十二年擢刑部右
侍郎二十三年轉左二十五年丁母憂二十八年
服闋補刑部左侍郎兼管右侍郎事二十九年三
月授佐領三十年正月以疾乞休

諭照舊供職六月擢工部尚書十月以疏濬城河浮估降

補通政司叅議

命以所降級休致四十年十二月卒年七十七

李蔭祖

子鈞

李蔭祖漢軍正黃旗人陝西提督李思忠次子順治五年由廕生授戶部員外郎八年遷郎中九年擢都察院左僉都御史十一年二月

命同尚書巴哈納等分賑保定諸府旋授直隸山東河南

總督加兵部尚書銜疏請豁免被災州縣秋糧又以流民令歸原籍恐道殣者多請隨地安集即時散賑又疏言直隸瀕海汛地北塘澗河黑洋宜分兵駐守至禁止海船恐魚鹽米麥不能轉運請令官為列號稽察出入則商民俱便疏並下部議從之十三年四月疏劾河南管河道方大猷侵蝕工銀巨萬請逮治以除民害

上切責河道總督楊方興不先舉發革大猷職下撫按鞠

實論絞先是流賊高鼎據五臺山有年由三岔口
出擾正定諸府至是蔭祖遣井陘道陳安國撫降
之黨盡散尋疏言太行據天下之險三岔適當其
衝林密山深藏奸甚易自高鼎降後餘黨多散民
間雖遣兵往戍惟恐視營壘為傳舍仍致貽患養
癰請改設額兵六百統以遊擊一員專司守禦從
之十二月

上諭吏部曰三楚要地時方用兵總督職任綦重李蔭祖

年力富強才猷精敏其加太子太保總督湖廣軍務兼
理糧餉時大兵進剿貴州而湖廣未靖郝永忠袁宗第
劉體純李來亨等擁衆十餘萬據鄖襄間侵擾糧
運蔭祖疏言穀城地當四達賊騎出沒請移襄陽
水師及均黃漢陽諸營兵二千令副將于大海率
以駐守扼賊上流又言九谿界連巴蜀壤接容美
永順桑植保靖四土司賊人窺伺肘腋請撥武昌
洞庭營兵一千駐九谿屯備並下部如所請行十

五年漢陽天門潛江沔陽水災蔭祖奏請賑卹

諭曰漢陽安陸二府水勢漲溢窮民無食無居深軫朕懷
其令督撫按速圖多方拯卹務令得所十六年經畧大
學士洪承疇奏調湖北提鎮標兵六千駐守雲南
蔭祖以承疇已調湖廣兵萬三千五百有奇所留
提鎮標兵未可再調請

敕承疇就近召募其畧曰綠旗兵抽調在外難保其不逃
如承疇所攜長沙兵秦養數載其強壯者於額餉

外加給優厚去歲進征貴州逃遁尚多此可慮者
一湖南歲祲新收降衆不下數萬餬口維艱倘江
西及兩粵土賊乘間蠢動何以制之此可慮者二
流賊竄伏鄖陽諸郡向因我兵防禦多方不敢輕
離巢穴若守兵盡調恐賊勢內訐雲貴餉道中梗
此可慮者三滇中從賊兵丁多竄伏山谷今若募
之入伍應時即至可省驛送之費其便一此輩生
長賊營不習耕種一旦失業嘯聚堪憂有額餉分

給亂萌自息其便二迤西緬甸地利惟滇人熟知
敗逃賊將皆所素識遇有征戰可期奮往直前其
便三疏下部議並如所請是年蔭祖疏言郝永忠
等諸賊流毒全楚界連川陝河南非厚集兵力無
以資撻伐請

敕四川總督李國英駐兵重慶首扼巫峽旁塞達州門戶
以西安將軍富喀禪統兵趨興安會剿其河南協
剿兵亦赴襄陽聽調扼賊去路臣請率綠營兵及

駐防荊州勁旅一出曩陵一出襄陽一出鄖陽三路並進搗賊巢穴以期迅奏膚功疏既上會海賊

鄭成功犯江南

詔將軍明安達哩率荊州駐防兵赴援部議暫寢其事仍勅所在督撫鎮將相機撫剿十七年以疾乞罷

命還京調治康熙三年六月卒年三十有六

賜祭葬如例祀直隸河南山東湖廣名宦子鈞康熙六年任佐領八年授兵部督捕員外郎十三年以叅領

隨大兵剿逆藩吳三桂凱旋遷刑部郎中尋遷監察御史二十七年湖廣督標裁兵夏逢龍糾眾倡亂大兵往剿給事中譚誼以湖北藩臬道府有已授而未之任者請嚴立限期

上命未莅任者並赴京候補另選員引

見授鈔湖北按察使與布政使于養志糧道王道熙知府武廷适等馳驛赴任二十九年調廣西按察使尋遷福建布政使內陞太常寺卿轉大理寺卿擢兵

部侍郎三十五年

上親征噶爾丹銬同左都御史于成龍等督運中路軍糧
出古北口至奎素沙深陷轂令士卒伐柳枝橫藉
沙面車得進至克魯倫河復

命轉饗赴西路大將軍費揚古軍凱旋叙功加四級三十
七年二月授山東巡撫以有疾未能即往辭十一
月改授安徽巡撫三十九年御史廖騰塏劾銬抱
疾不能理事下總督張鵬翮察寔

詔解任四十二年二月山東泰安等處饑

上既命賑慮倉粟不繼許官民願助賑者酌予議叙鈔請

往効力四月卒於賑所年五十有六

賜祭如例

耿繼茂

耿繼茂漢軍正黃旗人耿仲明長子順治初授子
爵六年隨仲明征廣東仲明死繼茂代領部衆隨
平南王尚可喜進征攻克南雄韶州廣州分兵平

肇慶羅定高州雷州八年四月

世祖章皇帝命繼茂襲父靖南王爵九年明桂王朱由榔將李定國犯廣西連陷郡邑繼茂同可喜遣兵赴援恢復梧州南寧平樂潯州橫州十年潮州總兵郝尚久據城叛繼茂同靖南將軍喀喀木豐順總兵吳六奇進剿圍城逾月招降賊將王立功使為內應遂樹雲梯登城殲賊無算尚久投井死潮州及饒平揭陽澄海普寧諸邑悉平十一年李定國

寇擾高雷廉三府進圍新會繼茂同可喜及靖南
將軍珠瑪喇擊走之定國遁據南寧復犯橫州繼
茂統兵由梧州至橫州擊走賊衆進剿南寧定國
遠竄十三年

賜敕紀功歲增藩俸千兩初繼茂與可喜攻下廣州怒其
民久相抗凡丁壯輒誅戮即城中駐兵牧馬營造
靖南平南兩藩府東西相望繼茂尤汰侈廣徵材
木採巨石於高要縣之七星巖工役無限制復創

設市井私稅民苦之會布政使胡章自山東調廣東行至江西聞官解為兵馬所占具疏劾繼茂可喜縱兵不戢狀繼茂奏辯曰前者我兵圍廣州九月被賊礮擊鋒傷不知凡幾城下之日即食肉寢皮未足洩憤俘繫實多至部衆初雖雜處旋即移駐北城未嘗久占官解可喜辯亦同胡章坐誣罷任逾年高要知縣楊雍正內擢給事中疏陳廣東採買濫役私稅諸大害謂一省不堪兩藩請移一

藩於他省疏下所司察議時貴州雲南底定經畧
大學士洪承疇請分駐重兵於要地於是

詔^繼茂鎮四川尋改鎮廣西皆未及移十七年七月

命移鎮福建時海賊鄭成功據金門島寇掠閩浙繼茂既
移鎮與總督李率泰協謀征剿屢奏捷康熙元年
繼茂偵知成功以狂疾死其子錦自襲偽延平王
賊黨嫌隙漸生導

旨相機剿撫尋招降成功族兄偽總管鄭泰泰遣偽中軍

楊來嘉吳蔭赴漳州獻其偽敕印成功弟鄭世龍
偽都督鄭賡楊富陳宗率偽官數百兵衆數千降
二年十月繼茂同率泰督兵渡海攻克廈門賊衆
驚潰水師提督施琅以所募荷蘭國夾板船邀擊
之斬級千餘乘勝取浯嶼金門二島錦與偽侯周
全斌等遁走銅山復糾賊衆突犯雲霄陸鰲諸衛
總兵王進功率兵與戰斬殺過半破賊巢於下蔡
逸賊悉墮水死偽將張傑吳盛率兵民來歸三年

三月繼茂復與率泰進功及海澄公黃梧統兵至
八尺門由海道拔銅山賊巢鄭錦集艦數十遁台
灣餘賊或斬或降獲戰艦軍器無算捷

聞得

旨嘉獎復加歲俸千兩十年正月疏陳疾劇請以長子精
忠代理藩務得

旨俞允五月卒

賜祭葬如例謚忠敏精忠嚴爵後謀反伏誅次子昭忠三

子聚忠別有傳

李林盛

李林盛漢軍正黃旗人父向舜以署佐領從豫親王多鐸南征督礮攻武岡寨克其城及攻揚州中礮沒於陣贈雲騎尉順治三年林盛襲父職七年

恩詔加授騎都尉十五年隨信郡王多尼征雲南康熙元年授佐領十一年遷叅領十八年擢山東登州總兵二十一年以舉首劣員耶盛春胡鼎通同行賄

得

旨嘉獎下部議敘加一級二十三年擢廣西提督三十六

年

諭獎其和輯兵民安靜謹守三十七年五月調陝西固原

提督十一月

陞見

賜孔雀翎加右都督銜尋

諭大學士等曰李林盛居官甚優前者陞見所奏絕無隱

諱廣西武弁賢否皆從公敷陳其言朕皆書而誌之矣

三十八年七月

御書明信敷義額

賜之八月因湖南賊黃明等盤據廣西年久失於覺察奉
旨降二級戴罪圖功四十年

諭曰頃聞甘肅提督雷繼尊病故彼雖到任不久居官不
下於孫思克今甘肅地方緊要固原提督李林威雖已
年邁其人材亦與孫思克等著調補甘肅提督四十三

年以病免四十七年

特授鑲紅旗漢軍都統五十二年以老乞罷得

旨卿才品優長簡任都統正資料理覽奏求罷情詞懇切
著以原官致仕五十三年卒

賜祭葬如例

周卜世

周卜世漢軍正黃旗人父繼新管佐領任鎮江副
都統順治八年二月卜世由監生授通政司副理

事官五月遷大理寺副理事官十六年八月遷刑部郎中十八年十一月授長蘆鹽運使康熙六年巡視鹽政寧國珍奏卜世帶徵積年鹽課全完請予議叙部臣以無例寢議

聖祖仁皇帝諭曰原疏內稱道府等官完帶徵六萬兩以上者不論俸滿即陞今周卜世自任事以來設法帶徵全完可嘉宜優敘內陞以示獎勵尋定議依限全完鹽課三十萬以下即陞及加級紀錄有差卜世徵完

三十五萬兩以上從優內陞七年二月授右通政
八年十月轉左十年四月遷太僕寺卿尋游遷太
常寺卿大理寺卿十二年四月擢倉場侍郎十三
年十月因逆藩吳三桂陷湖南四川

詔設直隸山西山東河南等處援剿提督總兵招兵自隨
以卜世為山東提督應設標下官員聽於武進士
舉人內揀選給劄効用又自疏請兼用旗下舊人
才能素著之叅將祖朝選守備張所元等隨營十

一月駐青州十二月調山西提督部議標設四營
各官員兵丁及置買營馬盛甲器械聽其酌量行
時陝西提督王輔臣叛賊將朱龍等四路侵掠臨
延安卜世撥兵防河四月賊自石樓渡河卜世遣
叅將陳茂林擊走之十月疏言寧武一協管轄三
關七路其兵馬錢糧盜案原係提督統轄嗣因提
督奉裁歸大同鎮兼轄今臣既以提督統轄全省
寧武文移由大同轉報往返稽遲請仍歸提督統

轄為便疏下部議從之十五年九月疏劾山西巡撫達爾布令屬員派民出銀為已建立生祠請移蒲州守道駐平陽俾得規避衝要徇隱貪劣之平陽知府袁國梓臨汾知縣劉通濬不行糾劾以私怒拘禁無辜酷刑拷詢

詔達爾布解任

命侍郎果斯海往察審覆奏蒲州守道不應移駐平陽達爾布違禁建祠誣良濫刑屬實應革職杖流卅世

所指袁國梓劉通濬賊款屬虛應革職得

旨免達爾布杖流卜世免革職十六年九月

命率所轄官兵赴湖廣軍前標下叅將祖朝選等各加銜

一等兵丁加賞賚時賊帥吳應麒據岳州十七年

六月大將軍貝勒尚善令卜世統兵進洞庭湖駐

君山規取岳州賊乘鳥船出犯擊敗之復奉令防

禦東湖卜世移駐扁山敗賊兵於西湖柳林嘴擊

壞賊船四賊遁入城將軍鄂訥疏劾副都統德業

立與卜世不截堵賊船

詔大將軍貝勒察尼覈覆奏卜世畏縮怯懦應革職得

旨從寬留任戴罪圖功十一月移師九馬嘴等處絕賊糧

道十八年岳州賊遁卜世同輔國公溫齊等追剿

至南靖港斬賊二千餘復由大井驛追殺賊衆至

王家鋪太平川又同都統覺羅珠滿規復湘陰師

至歸義河遇賊衆二千餘斬殺過半擒偽官四員

進薄城下督兵豎雲梯登城殲賊三百餘入城撫

集難民五千餘尋奉

詔聽綏遠將軍蔡毓榮調遣十九年三月進次大敷溪偵
賊據麻一汛分兵水陸齊進扼據隘口斬二千餘
人追奔數十里八月進征貴州攻克塘頭隘連克
蔣溪鎮江閣小岩關大岩關太平關及鸚鵡渡殲
賊六百餘乘勢恢復思南府二十年四月勦賊遵
義城守偽總兵劉應昌等七人以城降賊帥馬寶
遁據白蠟坎卜世乘勝追逐至鴨溪口殲賊一千

五百餘撫降真安州仁懷綏陽桐梓等縣六月奉
詔駐守遵義二十一年以雲南既平撤回時裁山西提督
議政王大臣等奏卜世前經議敘功加十等因不
截堵岳州賊船抵罪嗣隨大軍剿滅各處賊衆應
與開復或以文職用或候補提督得

旨以本旗相當員缺補用二十四年管佐領二十九年授
叅領三十年擢正黃旗漢軍副都統三十二年擢
都統三十五年二月

上親征噶爾丹令卜世領正黃旗小營以從四十年正月
以老疾乞休得

旨原品休致四十四年四月卒

賜祭葬如例

欽定八旗通志卷一百九十四